


Ina buna fotografia raquinta in'entira istorgia che tut chapescha

Purtret dal fotograf Andri Pol

DA CLAUDIA CADRUVI / ANR

■ **Andri Pol ha survegnì ils ultims onns blers premis per sias fotografias. Uss ha el retschavi il Premi da pressa svizzer 99 en la categoria dals portrets.** Pol che viva a Basilea ha fotografà il chantadur Göla curt suenter che lez ha annunzià ch'el sa retiria da la publicità. Per pudair far las fotografias cun Göla ha Pol duvrà bler diplomazia. Il chantadur aveva uschè avunda da las medias ch'il fotograf ha duvrà quatter dis per «persvader» el. La fin finala ha Pol survegnì fitg paucas minutas per fotografar il star.

Pol mussa blera chapientscha per la tenuta da Göla: «El è tantas giadas vegnì cuglienà da schurnalists, ch'igl n'è betg da smirvegliar.» Gist perquai lavura il fotograf er betg ensemen cun mintga schurnalist. El na fetschia betg reportaschas cun schurnalists che cugliunian la gliעד, e che manipuleschian la verdad a moda ch'els hajan suenter ina buna story. E per el sco fotograf valan las medemas reglas sco per quels che scrivan: El avess avunda fotografias che mussian prominents en fitg curiosas posas u situaziuns. Sia etica na lubescha dentant betg da publitar tals maletgs. D'in tal agir pitess er sia reputaziun. Sco fotograf vul Pol mussar il



Pol, in fotograf rutinà che improvisescha era gugent. ANR

caracter dad ina persuna. Quai na sa lascha betg far cun in fotografia sensaziunala. Lezza resplenda be in pitschen mument plitost negativ da la vita d'ina personalitad.

Fotografar in um pussent

Savens survegn Pol er incaricas per il Magazin dal «Tages-Anzeiger». Dacurt è cumpari là in artitgel davart il directur da la Credit Suisse Rainer E. Gut. Las il-

lustraziuns tar l'artitgel mussan exemplaricamain co il fotograf lavura. Era qua hai già num l'emprim persvader il directur da star avant la camera. Quindesch minutas ha Pol già peda da fotografar Gut, ed i ha en quest temp anc ina giada duvrà discussiuns per pustar Gut avant ina paraid cler blaua. Il fotograf leva accentuar ils egls blaus da Gut avant questa paraid. Ed igl è grategià: Cun in effect spezial da glisch ha Pol fatg portrets dal directur da banca ch'èn betg sulet ina illustraziun dal text, ma bain che stattan per sa sez. Be cun guardar las fotografias cun il directur da banca – e senza leger il text – san ins che quai è in um cun blera pussanza e forza che calculescha bain e na sa lascha betg starmentar. Gist quai ha Pol vulì retegnair cun sia camera. Per ordinari dovrian ins per portrets bler dapli temp, almain in'ura. Ideal fiss er in entir di, declera Pol, ma entirs dis hai darar. Perquai dovri adina era l'intuiziun e l'experiencescha che gidan a far ils buns maletgs.

Blocher e Dreifuss

Ina fotografia saja buna sch'ella raquinta ina istorgia u sch'ins possia mussar ella en in auter pajais cun ina outra cultura ed i saja immediat cler tge ch'ins manegia. Ina tala fotografia ha Pol fatg a la

festa da lutga (Schwinger) svizra a Cuira avant intgins onns. Igl è in maletg ch'è daventà en quests dis tuttenina puspè brisant. A la festa da lutga ha el retegnì Blocher e Dreifuss: Sin la fotografia fa Blocher in grond smani e chatscha bunamain a chantun la cussegliera federala. Quest maletg raquinta ina istorgia che vegnia chapida dapertut sin il mund, er da gliעד che na haja nagina idea da las relaziuns politicas svizas.

Fotografias per «stop aids»

E co davent'ins in fotograf tschertgà che survegn incaricas interessantas? En sazez leva Pol daventar graficher. A la scola d'art a Lucerna ha el l'emprim ina giada studegià magister da disegnar. Plaunet ha el cumenzà a lavurar sco fotograf liber per differentas illustradas e gasettas. A Londra è el lura sa perfecziunà en il royal college of art. Uss lavura Pol prest 10 onns sco fotograf. La glista da gasettas che engaschan el è lunga: Tages-Anzeiger Magazin, Annabelle, Facts, Cash, NZZ Foglio etc. Quai è gist las meglieras e pli enconuscentas adressas per fotografs en Svizra. E proximamain cumpara puspè ina nova campagna da «stop aids». Ils maletgs persunter vegnan or da la camera da Pol. Guardar cun tge istorgias ch'il fotograf vegn ad avertir la populaziun svizra!?